



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITII S. DISPUTATIONIBUS
*manè discutienda, in Scholis Medicorum, die Mercurii nona
mensis Junii, Anno Domini M. DCC. LI,*

M. GEDEONE DE RABOURS, Doctore
Medico, Præsede.

An Fumus Cespitum inflammabilium, Picardis Tourbes, sanitati noxius?



EMPESTATUM viscissitudines maxima secum
inferre incommoda, Medicinæ limina subintranti no-
tum, agnovit antiquitas. Hippocrates Medicorum me-
ritò princeps asserit, (a) mutationes temporum potissi-
mum parere morbos. Quot & quantas edat strages im-
moderatum frigus, vident quotannis Medici, Præcipuum hygieines

(a) Aph. 1.
Sect. 3.

institutum ; eas convenientibus antevertere præfidiis ; in his investigandis ab origine mundi sedulò allaboraverunt homines. Singulis omni ævo , cunctis in locis , innotuit vitandi frigoris necessitas. Ipsamet animantia solo instinctu ducta nemorum recessus , ipsiusque terræ intimiora viscera penetrare non reformidant , semestri ut plurimum sepulta somno , per totum illud tempus jejunium facillè ferunt , dum scelerato frigori sese subripere possint. Alia veniente brumâ , numerosioribus longioribusque non benefica minùs quàm provida mater vestit pilis , qui redeunte vere suâ sponte diffluunt. Homines hisce orbatæ præfidiis , indigitante naturâ , tempestatum vicissitudini accommodata sibi confecerunt vestimenta ; quæ arcendo frigori cùm non sufficerent , nova quæsierunt adversus hyemis inclementiam munimenta. Artium inventrix necessitas , docuit primùm ex scilicet scintillas excutere , ignemque foliis suscipere ; huic pabulum abundè ministrabant tunc immensa ubique nemora saltusque. Nondum enim invaluerat Principibus mos insontes vicinorum radicitùs evellere vel comburere sylvas ; nec oblectamenti causâ verterant in hortos , terras quæ ex divino instituto meliorem cedere debuerant in usum. Nec duris in rebus urgens egestas , mortales ferro terram vertere instituerat , sed deficiente glande victumque sylvis negantibus , frumentis labor additus , eruuntur sylvæ , luxuriaruntque fegetes ubi priùs superbiebant nemora. Hinc lignorum penuria , hinc indefessa hominum industria , eadem urgente vitandi frigoris necessitate , varias ignotasque prorsus antea materies , lignorum defectu commisit flammis. Alii paleas , exsiccatas alii herbas , carduos , filices , algam , placentas alii ex paleis animatumque stercoribus , vel ex pulvere corticis querni unà cum pilis animantium post *coriationem* residuis confectas. Nec dubitarunt interiora terræ viscera adaperire , undè diversa bituminum genera , carbonem fossilem &c , lignorum suppetias , eruerent ; terram ipsam igni committere tentarunt ; quibusdam enim in regionibus , Hyberniam præsertim , Hollandiam , Germaniam , & Picardiam , humilioribus in locis propè fluvios , reperitur terra quædam nigra pinguis , quæ siccata flammam facillè concipit , hanc ob lignorum penuriam igni committunt. De hisce populis non illepidè ita loquitur quidam , *oh miseram gentem quæ cibum suum bibit & terram suam urit !* Sic quoque cecinit *Constantinus - Hugenus Zalichem* (b).

(b) Lib. 1.
Epigram.

Est locus in Batavis ubi nec gratissimus hares ,

Terram defuncto non velit gravem.

Cum autem hygieines sex rerum non naturalium indolem ,

salubritatem & insalubritatem sedulò ita investiget, ut salubria vertat in usum, insalubria verò arceat vel emendet, non abs re erit hujus examini subicere cespitum inflammabilium naturam & imprimis ipsorum fumi. Si enim miasmatibus malæ indolis contaminatur, hunc sanitati noxium fore planè constabit, cum notum sit combustibilium quorumlibet corporum principia, respirationis ope, ad pulmones transmitti.

I. I.

IN reciproca inspirationis expirationisque actione totum animale systema consistere vel minimè attendenti patet. Per totum gestationis tempus *aeriprivium* absque noxâ perpeffus foetus, vix in lucem editus levi oscillatione respirationis inchoat opus, solâ morte cessaturum. Qualiscumque sit primæ illius inspirationis causa, sive à circumambientis aeris pressione & pondere, sive à reciproca pectoralium musculorum actione pendeat, explanandum physiologis mittimus. Ut autem ritè procedente respiratione, sarta testa que obtinetur sanitas, libera concinnaque functionum tam vitalium quam naturalium actio, sic qualicumque de causâ vitiatâ, innumera portentosaque ingruunt incommoda. Hinc dispnoia, asthma, ortopnoia, plurimæque alia quæ recensere vetant dissertationis hujus limites. Duplici verò de causâ vitiatur, vel ex parte solidorum, vel ex parte fluidorum. Inter vitia solidorum annumeranda veniunt, partium mala conformatio, musculorum nervorumque paralysis, costarum fractio vel luxatio, trachææ arteriæ bronchiorumve inflammatio. Inter fluida aerem maximas partes agere, primasque sibi vindicare in respirationis negotio innumeræ docent observationes. Aer autem non unius ejusdemque indolis est; sed ratione gravitatis, elasticitatis, caloris ac frigoris insigniter differt. Diversa quoque ejus conditio contentorum respectu; contenta autem illa ut plurimum sunt, partim exhalationes humidæ, partim impuritates salinæ, causticæ, sulphureæ, fermentescibiles, imò putredinosæ. Extrâ dubium positum est morbos, qui eodem tempore multos adoriuntur, & benigniori maligniorivè genio incidunt, non aliundè quàm ex adulteratâ aeris constitutione originem trahere: purus aer ille censetur, qui partibus noxiis vacat, & qui à variis adventitiis exhalationibus probè defœcatus est. Temperatus ille meritò dicitur, in quo nec calor nec frigus, neque humiditas modum excedunt. & qui blandâ ac moderatâ temperie gaudet. Hinc loca montosa & editiora, quæ ab omnium impurarum exhalationum colluvie vindicat crebrior ventorum perflatus, corporis salubritati maximè conferunt; humiliora verò, ob aerem magis densum, crassiorum, impurum, humidum impurisquæ foetum vaporibus, sanitati nocent; præsertim si aer ille effluviis mi-

neralibus, venenatis, arsenicalibus gravis, ex puteis aliisve locis diu clausis & derepentè reclusis erumpens, ut ita dicam, putrefactus, vel carbonis tum lignei, tum fossilis vaporibus onustus intrà pulmones admittitur; tunc enim maximos morbos persæpè mortem accersit. Sivè effluvia illa aëri permixta & cum eo, si ita loqui fas est, *identificata*, sanguinem pulmonalia vasa permeantem, inspissent, vel bronchia pulmonesque irritando, ac lancinando, laringem per consensum adeò constringant, ut facilem aëri ingressum vel regressum denegent. Memoratæ superiùs aëris venenati dotes tot & tantas tamque funestas edunt strages, ut summâ cautione vitari debeant, penitusque ex hominum consortio exulare. Ast multa alia existunt in rerum naturâ, quæ quamvis primâ fronte nullam venenatam indolem præ se ferre videantur, temporis successu eò certius sanitati labem inferunt, quò lentius & sensim sine sensu vires suas exerunt. Inter ea adscribi debent materies sulphureo principio turgidæ, arsenicalique labe inquinatæ, qualia sunt cespites nostri inflammabiles; porro cespitum inflammabilium miasmata sedulò perpendenti, ea malæ indolis esse, & progressu temporis œconomiam animale, deleteriâ suâ qualitate, pervertere posse liquidò constabit.

I I I.

SUPRADICTIS in regionibus ad quatuor vel quinque pedum circiter altitudinem fodientibus conspicienda sese præbet terra quædam, quæ recens, nigra, pinguis, ponderosa, siccata verò levior flammam facile concipit. Varia variis in locis sortitur nomina. Anglis, Germanis, Hollandis, *turf*, *torf*, *darri*, latinis *cespes inflammabilis*, *turfa*, Picardis *tourbes* audit, cujusquidem, qualitatis ratione, non una species. *Hadrianus Junius* (a) tres præcipuas recenset. Prima quæ vilior levissima tota foraminibus porisque conspicua spongiam non malè refert, colore ad rubiginem accedente. Secunda firmior & compactior, flavi coloris baccillis arundinibusque intertexta mediocriter ponderosa, usu superiorem antecellit, inter optimas tamen nequaquam annumeranda; de eâ sic loquitur *Andreas Libavius* (b); *Brabantii & Frisii*, aliique *Germaniæ inferioris populi*, suam *darri* & *dorsenas* habent, quæ congerie radicum & terreno bitumine qualis est terra *Coloniensis* constant; hoc genus solitarium inflammari non est mirum, radices enim arefactæ sunt; cespes arundinaceus nuncupatur. Tertia ponderosior, densior, siccata coloris extùs cineritii, intùs nigerrimi, in eo præcisè à præcedentibus differt, quod difficilius quidem flammam concipiat, sed diuturnius igni præbeat alimentum, tardiùsque in cinerem abeat. Aliæ adhuc desumuntur differentiæ, à figurarum diversitate petitæ; levioris autem sunt momenti, ab operariorum enim libitu, locorum-

(a) Histoire
des Pays - Bas
chap. 15.

(b) Lib. 4.
de orig. ic-
tum.

ve consuetudine omninò pendent. In Picardiâ juxtâ Somonam duplex tantum species vocatur in usum; priore ut inutili prorsus neglectâ, duæ posteriores tantum fodiuntur. Sicut & lignorum sic cespitum inflammabilium sectio sua obtinet tempora. Aprili & Maio operi sese accingunt Somonæ, accolæ soli exploratione certiores prius facti tum quantitatis tum qualitatis materiæ extrahendæ. Terram ligonibus aggrediuntur, inutilique semotâ, fodere non desinunt, quin apparuerit terra illa inflammabilis, laboris causa & merces. Hanc instrumentis eum in usum paratis secant in formas oblongo quadratas, lateres apprimè referentes; anthliis indefinenter exhauritur aqua ne laborantibus officiat. Nec labori finem prius imponunt, quam omnis exhausta fuerit materies. Interea cespites illos *lateriformes* colligunt in acervos pyramidales, ita dispositos ut facilem & liberum undequaque aeri itum & reditum præbere possint; sicque per totam æstatem solis radiis exsicandos relinquunt; quò enim sicciores, eò pretiosiores sunt, & concipiendæ flammæ aptiores. Cespitum inflammabilitatem à sulphure & bitumine oriundam esse scripserunt antiqui. Eos, asserit *Carolus Patinus*, (c) ex sulphure & bitumine crasso constare. Ex *Georgio Agricola*, (d) nulla terra pinguis ardet nisi sulphurata fuerit & bituminosa. Unde sic cecinit *Ovidius*.

(c) Traité des Tourbes comb. chap. 6.

(d) Lib. 1. de ort. subter. part. 12.

Sive bitumineæ rapiant incendia vires,

Luteaque exiguis ardescunt sulphura fumis.

Sulphuris quidem mineralis præsentiam in cespitibus facile probat experimentum. Si enim carbonibus cespitum accensis affundatur aqua, tunc spississimus foetidissimusque exurgit fumus; hepar sulphuris vel ova putrida redolens. Maximam prætereà bituminis copiam cespiti nostro inesse deducebant antiqui ex fuliginis quantitate & consistentiâ; cum enim multò major reperiatur fuliginis copia in caminis in quibus comburuntur cespites illi, & prætereà fuligo illa nigerrima, pinguis, picis similis, lapideam acquirat duritiem; hæc omnia partibus bituminosis terreisque, ignis calore exsiccatis tribuenda esse autumabant; *Cardanus* (e) enim scribit fuliginem esse quoddam bituminis genus. *Scaligerus* (f) verò contendit bitumen esse quid fuligini simile; hanc quoque amplectitur sententiam *C. Patinus* (g); asserit enim maximam esse analogiam bitumen inter & fuliginem, ita ut unius præsentia, alterius præsentiam invictè demonstret. Cum insuper in plerisque fossilibus facile flammam concipientibus, ambaro, v. g. naphthâ, succino, carbone fossili & lapideo, maxima, eorum iudicio, reperiretur bituminis copia, analogiâ ducti cespites illos iisdem gaudere principiis concludebant, deleteriamque huius fumi indolem, à bitumine aeri commixto

(e) Lib. de subtilitate.

(f) Exercita. 56.

(g) Loco citato.

repetebant. Undè evidenter pater cespites inflammabiles ab ipsis inter mineralia annumeratos fuisse. Quod falsum arguunt tum sola texturæ inspectio, tum analysis chimica. Nudis enim oculis, ex multitudine juncorum, arundinum, herbarum, radicum, cespitis inflammabilis substantiam undequâque permeantium ad vegetabile regnum eos pertinere in pro patulo est. Oculis verò microscopio armatis, nil nisi foliola, cauliculi & radiculae in materiâ illâ nigricanteprehenduntur. Eiusdem asserti veritatem invictè demonstrat analysis chimica. Si enim terra illa chîmico subjiciatur examini multum phlegmatis, parum spiritûs salini, olei spissioris foetidi mediocrem quantitatem largitur; carbone superstitè in cineres exusto, prodit sal nigricans impurus, quod sapore falsum magis quàm lixiviosum alcalinum deprehenditur, quodque solutione & filtratione depurgatum abit in crystallos *cubiformes*. Præterea oleum illud spissum foetidum, quod pro genuino bitumine habebant Antiqui, spiritu vini rectificatissimo infusum, justo calore, statim fermè totum solvitur in tincturam obscure rubram, unde certò constat cespites illos, vegetabilis esse prosapiæ, olea enim è bituminibus, analysi chîmicâ, prodeuntia, lentè & parcissimè spiritu vini solvuntur.

I V.

FUMUS omnis in genere oculis, capiti, pulmonibusque gravis est. Eò autem gravior quò spissior, principiisque magis onustus; quæ, seorsim sumpta, deleteriam aliquam participant naturam. Sic se habet cespitum inflammabilium fumus, cæterarum enim materialium combustibilium fumum tum spissitudine tum foetore antecellit. Solisque idè pauperibus comburendi relinquuntur cespites illi. Hunc autem in modum ignem conficiunt. Carboni accenso circum & superimponunt cespites illos *lateriformes*, ita dispositos, ut liber intus aeri pateat aditus; flabello flammam exsuscitant. Vix flamma adoritur cespites, exurgit foetidissimus, spississimusque nigerrimè vel rubiginèi coloris fumus, qui inter arctos camini limites contineri nequit, totumque replet tugurium; antrum Caci diceres à Virgilio descriptum, nam

Æncid. Liv.
8.

*Ingentem fumum, mirabile dictu,
Evomit; involvitque domum caligine cæcâ,
Prospectum eripiens oculis, glomeratque sub antro
Fumiferam noctem, commixtis igne tenebris.*

Non solum omnis tugurii suppellex, sed & linteamenta, incolarumque cutis oleaginosa rufo tinguntur colore, unde tum sensibilis tum insensibilis minuitur perspiratio, fons morborum uberrimus.

Hos præterea indefessus ubique comitatur foetor; occurrentibus gravis. Foetorem autem illum à materie sulphureâ, partibusque tam salinis quam & forsân arsenicalibus, aerî, ignis actione commissis oriri, expertus quilibet non ægrè fatebitur. Licet enim foetor ille à palustri alimento, quod imbibunt cespites illi, generatim derivari possit; sulphureo tamen principio, quo maxime turgent, adscribendus est. Bituminosa verò materies, quam pro foetoris causâ plerique habuerunt, hîc nulla est. Sed alia mineralia salia, largius cespitibus immixta huic plurimum conferre videntur & imprimis sal glauberiano simile, quale *Degnerus* è cespitum cineribus obtinuit; quod quidem sal glauberianum, cum *phlogistico* principio sulphureum odorem, adustione, formare posse multis experimentis abundè probatur. Cum insuper fossilia pleraque arsenicalis veneni suspitione non omninò vacent; nec eâdem arsenicali indole carent cespites inflammabiles, quorum plurimî, expertissimi oculatissimique chimicis in rebus *Becheri* iudicio, metallum exhibent, combusti verò arsenicum largiuntur. Quantum noceant vapores è solo sulphure accenso oriundi, vel invitus experitur quilibet. Fugiendos eos esse clamant antiquorum neotericorumque scripta. *Sulphur minerale accensum* (inquit) *Hoffmannus* (a) *peculiariter foetidum & gravem spirat odorem, qui valdè sese diffundit, non modò naribus molestus, sed & respirationi infensus, qui in magnâ copiâ admixtus suffocationem infert.* Vapores enim illi tenuiores subtilioresque igne facti, in aerem evecti, ibique conclusi, mediante inspiratione, per nares ad caput, & per asperam arteriam intrâ pulmones admissi, propter summam suam subtilitatem, partium solidarum vaporumque poris sese intimè insinuant, inque minimos cerebri, meningum, nervorumque poros penetrando, ibique fluidum illud tenuissimum quod sensibus & motibus præest inquinando functiones animales subito perturbare atque invertere valent. Accedit etiam quòd aer horum vaporum copiâ imbutus, atque intrâ pulmones susceptus de vi suâ elasticâ in expandendis vasis & vesiculis pulmonalibus multum amittat; tussisque excitat enormes, præsertim in iis qui debili donantur pectore; peripneumonias quandoque, hæmoptoes, cephalalgias, hemieranias, sensuum & visus hebetudines, ophthalmias, lippitudines, vertigines, asthmata, suffocationes, frequentesque creant phthises. Aliundè cum in coquendis cibis, cespitibus illis in carbonem redactis, multâ adhuc sulphureâ materie turgentibus utantur, obsonia cespitum illorum naturam, ut ita dicam, participant; sulphureisque miasmatibus deleteriis onusta, multis primarum viarum vitiis ansam præbere possunt.

(a) Lib. 3.
obser. Chym.
Phys. obser.
9.

CESPITUM inflammabilium fumum, deleteriam participare indolem ulterius demonstrabit, dubiosque & ancipites nobis reddet suffragantes, petita è cadaverum sectione auctoritas. Nemini è memoriâ excidit frigus intolerabile anni suprâ millesimum septingentesimum quadragesimi primi, quotque tunc pullularint ubique morbi epidemici, tum à frigore, tum à frugum penuriâ vel pravitate oriundi. Nullibi tamen magis sævierunt quàm Ambiani, apud pauperes, præsertim in carceribus; cùm enim tum maximus esset detentorum numerus, cùmque præ frigore algerent & ægrotarent quamplurimi, in carcerem introductus est ignis è cespitibus illis, ob vilitatem pretii, confectus: sed inciderunt in Scyllam cupientes vitare Carybdim. Nam cùm conficiendo maximo igni nullus alius esset locus præter vastam cameram fornicatam, in quâ non erat caminus, fumus foetidissimus, per exiguam fenestram januamque semiapertas ob atrocitatem frigoris, vix egrediens, obstantibus aliundè aquilonibus, fumus, inquam, in interiores carceris recessus quinquaginta & sexaginta pedes altos adactus, omnes carcere detentos in atrocissimos coniecit morbos; suffocatique periissent ad unum, omni orbati auxilio. (Multi enim ex iis qui miseris opitulabantur contagione correpti occubuerant) periissent, inquam, nisi pestiferum hunc carceris aerem cum puriore permutassent. Interiere tamen quamplurimi, quòd sanè ab ardentis cujuscumque ligni fumo non fuisset adeò pertimescendum. Sectis cadaveribus, pulmones tumefacti, plurimo sanguine nigerrimo distenti; aspera arteria, bronchiorum ultimæ ramificationes, vesiculæque pulmonales, fuligine quâdam pingui, oleaginosâ obductæ, solam genuinamque præ se ferebant morbi mortisque causam. Cùm itaque ex cognitâ, chemicæ analysis ope, cespitum inflammabilium naturâ constet, sulphuream materiem, arsenicalis contagii labe non omninò iminunem, illorum compositionem pro maximâ parte ingredi; cùm aliundè extrâ omne dubium positum sit, miasmata ejusmodi sulphurea, ignis actione aeri commissa deleteriam participare naturam, sanitati que infensissima esse; hisque rationum momentis cumulum addat, petita è cadaverum sectione, auctoritas in procinctu est concludere;

Ergo Fumus Cespitum inflammabilium, Picardis Tourbes, sanitati noxius.

Proponebat Parisiis JOANNES-BAPTISTA BASSEVILLE,
Ambianus, Saluberrimæ Facultatis Medicinæ Parisiensis Baccalaureus A. R. S. H. 1751, A SEXTA AD MERIDIEM.